

Fesili e masani ona faia Ripoti o tamaiti a'oga ta'ito'atasi

NAPLAN

2021

O le NAPLAN, o se su'ega o le faitau ma tusitusi ma le numera a tamaiti i Vasega 3, 5, 7, ma le 9 i le atunu'u atoa, ma e su'eina i le masina o Me i tausaga uma. O le malamalama i le faitau ma tusitusi ma le numera, o faavae taua ia o soo se a'oa'oga. Na o le NAPLAN le su'ega i le atunu'u e mafai ona aofia uma ai tamaiti a'oga i Ausetalia. O fesili e faavae i mataupu o loo i le silapasi Australian Curriculum: Igilisi ma le Matematika.

O faai'uga mai le NAPLAN, e iloa ai e matua/tausi tamaiti ma faia'oga le tulaga tuputupua'e o le fanau i le faitau ma tusitusi ma le numera i se vaitaimi - i lona tulaga na o ia ma lana a'oga, ma faatusa i le tulaga atoa o tamaiti i le atunu'u.

O su'ega o le NAPLAN, na o se tasi lea o vaega o iloiloga ma ripoti a a'oga ta'itasi, ma e le sui tulaga i le tele o isi iloiloga faifaipea o loo faia e faia'oga i le a'oa'oina o tamaiti ta'ito'atasi. O le faia'oga a lou alo e aupito sili ona tele lona silafia i le tulaga tuputupua'e o lona a'oa'oina. A tu'u faatasi ma isi ripoti o su'ega, o ripoti o le NAPLAN e mafai ona fa'aaoga i faatalanoaga ma lana faia'oga i vaega o loo malosi ai lona a'oa'oina ma ni vaega e fia faaleleia atili.

O a fea ou te mauaina ai ripoti NAPLAN a la'u tama ma o a mea e ta'u mai ai?

A faapea o 'oe o se matua/tausi tamaititi o se tamaititi a'oga na su'e i le NAPLAN ia Me o le tausaga nei, o lana a'oga e tu'uina atu se ripoti i le faai'uga o su'ega a lou alo.

E mafai ona maua atu le ripoti o le NAPLAN a lou alo mai le masina o Aukuso, pe a mae'a ona tu'uina e pulega fai su'ega i setete ma teritori (www.nap.edu.au/taa) ripoti o le NAPLAN a tamaiti ta'ito'asi ia latou a'oga.

O le a e silasila i faatulagaga 'ausia e lima (poo 'va'a roketi') e faailoa atu ai tulaga na 'ausia e lou alo i le NAPLAN mo le faitau tusi, tusitusi, sipela, kalama & faailoga, ma le numera.

O faai'uga o le faitau ma tusitusi ma le numera mo Vasega 3, 5, 7 ma le 9, e lipotia i le faatulagaga Fusi 1 i le Fusi 10. O le faatulagaga lena o loo atagia ai le si'itaga i le tulaga o le iloa, malamalama ma tomai e pei ona faaalua i le su'ega.

E faapefea ona tu'uina le NAPLAN i a'oga?

Ua faagasolo atu le NAPLAN i le faia i luga o le 'upega feso'ota'i, e le toe faia tusi pepa ae o luga o le 'upega feso'ota'i e amata atu i le 2022.

O lona uiga, ia Me o le 2021, o nisi tamaiti na su'e le NAPLAN tusi pepa, ae o nisi na su'e i luga o le 'upega feso'ota'i.

O le su'ega o le NAPLAN i luga o le 'upega feso'ota'i, e sili atu ona manino faai'uga ma fiafia iai tamaiti.

E faapefea ona ou faitauina le ripoti?

I lalo o va'a roketi ta'itasi, o loo iai se faamatalaga e faailoa atu ai pe na faia e lou alo le su'ega i luga o le 'upega feso'ota'i pe na tusi pepa. O tamaiti uma i le Vasega 3 e faia tusi pepa le su'ega tusitusi.

Tusa pe na faia atoa le su'ega i luga o le 'upega feso'ota'i, pe na faia tusi pepa:

- e iloiloina le tulaga o tamaiti i tomai o le faitau ma tusitusi ma le numera e tusa ai ma auala na a'oa'oina ai i le silapasi
- e faaauau ona fua faai'uga o su'ega a tamaiti i le NAPLAN i le faatulagaga e tasi, o lona uiga o faai'uga o auala e lua e tutusa.

E aoga le NAPLAN o se auala e iloa ai le tulaga o le a'oa'oina o se tamaititi faavaitaimi, ae tatau ona va'ai ma le faaeteete i ripoti nei, ona e na ona atagia ai le tulaga o le tamaititi i le aso na faia ai le su'ega.

Na o fusi e ono aupito talafeagai mo faatulagaga faale-tausaga e faaalua i le ripoti a le tamaititi. O le ripoti o le Vasega 3 e faailoa atu i fusi 1-6, o le ripoti Vasega 5 e faailoa atu i fusi 3-8, o le Vasega 7 e faailoa atu i fusi 4-9, ma le ripoti o le Vasega 9 e faailoa atu i fusi 5-10. O ata o loo faaali atu i le ripoti a le tamaititi o loo faailoa atu ai le fua faasolo mo le 60 pasene o tamaiti, le faai'uga ogatotonu mo le atunu'u, ma le tulaga aupito mauualalo mo lona tausaga. O ripoti i nisi o setete ma teritori e faailoa atu ai foi ma le faai'uga ogatotonu o le a'oga ma/pe setete. E tu'uina atu ai foi i le ripoti se aotelega o tomai na faaalua e tamaiti i tali o le su'ega mo fusi ta'itasi.

E faapefea ona fesoasoani le NAPLAN i la'u tama?

O le NAPLAN e maua ai e tamaiti uma se avanoa e faaalua ai vaega ua latou a'oa'oina i mataupu o le faitau ma tusitusi ma le numera. O faai'uga a tamaiti ta'ito'atasi, e iloa ai e matua/tausi tamaititi le tulaga o lona alo i su'ega o le faitau, tusitusi, sipela, kalama & faailoga, ma le numera.

O le tulaga na 'ausia e lou alo e faatusa i le tulaga o isi tamaiti i Ausetalia atoa, e le na o le tulaga o tamaiti i lana lava vasega. E aoga faai'uga o le NAPLANe faavae ai talanoaga a matua ma tamaiti ma le faia'oga i le tulaga a'oa'oina o le tamaititi. Ona o le NAPLAN e tuliloaina le tulaga o le a'oa'oina o lou alo i Vasega 3, 5, 7, ma le 9, e maua mai ai faamatalaga manino i le tulaga tuputupua'e o le tomai o le tamaititi i le faitau ma tusitusi ma le numera.

O le a se a'afiaga o le lumana'i o la'u tama mai faai'uga nei?

O faai'uga o le NAPLAN e maua atu ai faamatalaga taua i tomai o loo a'oa'oina e lou alo i le faitau ma tusitusi ma le numera i le silapasi masani a a'oga. O faai'uga e va'ava'alua ma isi su'ega o loo faia e lou alo i le a'oga. E maua atu ai se faamalamalama mo 'oe ma lana faia'oga, i le tulaga o iai le a'oa'oina o lou alo ma lona tuputupua'e i le taimi o le su'ega. O faamatalaga nei e ono fesoasoani i lou alo ina ia 'ausia le tulaga maualuga na te mafaia.

O nisi a'oga e tapa mai ripoti o le NAPLAN, i luga atu o ripoti a le a'oga sa iai, o se vaega o le taliaina o se tamaititi. O su'ega o le NAPLAN e le'i faia ma le faamoemoe o se su'ega mo le taliaina o tamaiti i a'oga. Peita'i, e mafai ona aoga faamatalaga e maua mai ai mo le logoina o le a'oga fou i ni mana'oga faapitoa o se tamaititi. A iai ni mataupu o e popole iai, e fautuaina 'oe e le ACARA ina ia e talanoa i le a'oga.

E faapefea ona fesoasoani le NAPLAN i la'u a'oga?

Na o le NAPLAN le su'ega e mafai ona su'eina e tamaiti uma i Ausetalia. E fesoasni le NAPLAN:

- i faia'oga e faasino iai tamaiti o loo mana'omia nisi lu'itau poo ni fesoasoani lagolago
- i a'oga e faasino iai vaega o loo lelei ma vaega o loo mana'omia ona faaleleia i polokalame faafaia'oga

- i a'oga e faatulaga sini 'ausia mo le faitau ma tusitusi ma le numera
- i matagaluega o a'oga e toe iloilo ai polokalame ma lagolago o loo ofoina i a'oga
- i tagata lautele e iloa ai faai'uga ogatotonu o a'oga i luga o le My School website.

E va'ava'alua foi su'ega o le NAPLAN ma isi su'ega i a'oga i le aoina o faamaumauga e fesoasoani i le malo e iloiloaina ai le tulaga o polokalame o a'oa'oga ma iloa ai pe o 'ausia e tamaiti a'oga tulaga mo'omia i le faitau ma tusitusi ma le numera.

O ai nisi e silasila i faai'uga?

I tausaga uma, e tu'uina e pulega fai su'ega i a'oga faai'uga mo tamaiti uma e su'e i le NAPLAN. E una'ia a'oga uma e faaoga faai'uga nei e fuafuaina ai polokalame e faaleleia atili ai a'oa'oga. O ripoti o tamaiti e malu puipuia. E leai seisi i fafo atu o le pulega fai su'ega i lou setete poo le a'oga e va'ai i le ripoti a lou alo.

O faai'uga ogatotonu tu'u faatasi e lipotia faalautele i le *My School* (www.myschool.edu.au). O faamatalaga i le website e faafouina i faai'uga mai le tausaga ua tuana'i i le kuata muamua o tausaga ta'itasi. O le *My School* e maua ai se avanoa i tagata lautelee iloa ai le tulaga o le a'oga, ae le gata i lea e faia ai faatusatusaga ma isi a'oga o loo auai iai tamaiti e tai tutusa ma latou. O faai'uga a lou alo e le maua i luga o le *My School*.

Ae faapefea pe a o faai'uga e 'ese mai faai'uga na faamoemoe iai la'u tama?

NAPLAN tests assess learning progress in literacy and numeracy. Students are provided with an indication of where their results are located on the assessment scale for each test. While NAPLAN results can be compared nationally between all students and over time, a student's experience on the day of the test may affect their performance.

A iai ni au fesili poo ni atugaluga i faai'uga a lou alo mai su'ega o le NAPLAN, talanoa i lana faia'ogaona o ia e sili atu lona malamalama i le tuputupua'e o le a'oa'oina o lou alo.

Mo nisi faamatalaga i le NAPLAN ma/poo le suiga i le 'upega feso'ota'i, asiasi i le www.nap.edu.au